

## Samperu Corsu

1498 - 1567

Samperu hè natu in Bastelica in lu 1498. Lascia a so tarra à l'età di quindici anni pà diventà un suldatu di valori à u sirvizi di Ghjuvanni di i Medici in Fiorenza. Samperu si acquista nomina in l'Europa sana com'è un cunduttieri di prima trinca è passa à u sirvizi di parichji principi auropei, chì à mezu ci hà da essa Francescu u Prima, rè di Francia.

In lu 1553, Samperu hè à sirvizi di u rè di Francia quand'iddu sbarca in Bastia à u capu d'una schera corsa rinforzata da a marina turca cumandata da Dragut è da l'armata francesa di u Marescialu de Thermes. U scopu, pà Samperu, hè di libarà l'Isula da a duminazioni ghjinuvesa ; pà i Francesi hè d'attaccà à Ghjenuva alliatu di u rè di Spagna.

A conquista di l'Isula sana hè compia da issa cualizioni, fora di Calvi ch'arrisisti diventendu cusì pà Ghjenuva a cità "semper fidelis". U grandi Amiralì ghjinuvesu Andria Doria cuntrattacca ma Samperu vinci una battaglia trimenda à a Bucca di Tenda, in un scontru cù l'armata spagnola. In lu 1559 u trattatu di paci di Cateau Cambrésis rendi a Corsica à Ghjenuva. Samperu si senti traditu è si prumetti di cuntinuà a lotta è d'essa "piuttostu turcu cà ghjinuvesu".

In lu 1562, à u vultà da un viaghju in Urienti, Samperu tumba a so ghjovana moglie, Vannina d'Ornano, ch'avìa circatu di scappà si ni in Ghjenuva.

In lu 1564, Samperu sbarca in lu Valincu pà una siconda guerra di libarazioni contr'à Ghjenuva. Vinci l'armata ghjinuvesa in a pievi di Caccia è po pidda à Portivechju : hè maestru di a Corsica paisana. Ma Ghjenuva riagisci : manda u



capitanu Stefanu Doria chì sbarca in Corsica cù truppi numarosi è chì, pà indibbuliscia u sustegnu populari à Samperu, brusgia trentasetti paesi. In fatta fini chì, in lu 1567, Samperu hè assassinatu à tradimentu in Eccica Suaredda da i marcinarii ghjinuvesi è da trè frateddi d'Ornano, cugini di a so moglie Vannina. U fiddolu Alfonsu cuntinuighja a lotta fin'à u 1569 po si ni parti in Francia.

## I Turchi di Barbaria



Andrea Doria, grandi amirali ghjinuvesu (1466-1560).

À parta si da u 1511, a Corsica hè sott'à l'autorità ghjinuvesa di l'Uffiziu di San Ghjorghju. Iss'uffiziu metti in anda una pulitica capitalista è culuniali di missa in valori di l'Isula. Ma i tempa di guerra ùn sò finiti, è un antru priculu trimendu affacca à parta si da i principii di u sidicesimu seculu : i Turchi di Barbaria.

Partindu da l'Africa di u nordu, i *Turchi* o *Mori* assaltani i piaghji di u mondu cristianu par seculi è seculi. A Corsica hè una di i so predi ma u scopu ùn hè micca a cunquista d'un tarritoriu : i Turchi sbarcani da i so battelli pà metta à l'abbottu paesi è cità, piddà a ghjenti è purtà li in i cità d'Africa di u nordu da venda li com'è schiavi.

Pà i Cristiani in schiavitù a cundizioni hè pessima ; pà francà si la è ritruvà a so libartà, li tocca à pagà u *riscattu*. D'altri, pà forza o pà amori,

sceddini di cunverta si à a riligioni musulmana è sò chjamati tandu *rinigati* da i Cristiani. Uni pochi di quissi s'ani da fà cunnoscia com'è cursari barbareschi è, frà quissi, pudemu mintuvà u famosu Assanu Corsu, natu in Tavera, prighjuneru po schiavu in Custantinopuli è in Algeri, duvintatu dopu rè d'issa cità. À u sidicesimu seculu ci era à l'incirca seimila corsi in Algeri.

Da pruteghja l'Isula è i pupulazioni da l'assalti barbareschi, l'Uffiziu di San Ghjorghju faci alzà una cintinaia di turri da curà i spondi di l'Isula. Ma ùn bastarà par fà piantà in tuttu l'assalti ; quissi sò trimendi à u sidicesimu è à principiu di u diciassettesimu seculu ma vani à sminuiscia dopu. I cunsiguenzi sò maiò pà i loca piaghjinchi tocchi dinò da a malaria o *disabitati* pà via di i guerri cinarchesi. Certi loca sò abbandunati, i Corsi s'accoddini in i paesi muntagnoli.


## A Corsica ghjinuvesa

Finiti i guerri di Samperu, a Corsica campa pà un seculu è mezu l'ordini ghjinuvesu. U puteri hè in manu à un guvernatori mandatu da u Sinatu di a repubblica ghjinuvesa in Corsica è stabbilitu in Bastia.

In i cità di a piaghja (Bastia, Bunifaziu, Aiacciu, Calvi...), campani i pupulazioni d'urigena liguri. Trà Corsi è citatini ghjinuvesi, ùn hè micca listessa a legi è i Corsi sò accittati pocu è micca drintu à i muri di i *pracidii* ghjinuvesi. U populu corsu hè raprisintatu da i *Nobuli Dodici* davanti à u guvirmatori è u Sinatu ghjinuvesu. In più di i citatelli litturali, Ghjenuva hà in mani i turri è i casteddi chì si trovani longu à i costi di l'Isula.

U sinatu ghjinuvesu hà presu u seguitu di l'Uffiziu di San Ghjorghju in lu 1562. Ind'issu periodu ghjinuvesu si sviluppani i castagneti è l'aliveti, sò custruiti parichji ponti è stradi. I furesti sò sfruttati è u lignu ghjova da custruì battelli in l'arsanali di Liguria o in altrò.

Dopu à u 1569, si metti in anda a riforma di a ghjesia ditta "tridentina" cù l'azzioni di u vescu Munsignori Sauli. Si custruiscini parichji ghjesii è catidrali di modu baroccu, pà u più in a parti cismuntinca. À listessi tempa si creani parichji conventi, franciscani, duminicani o altri, duva i ghjovani corsi studiani pà duvintà clerichi. Sò iddi chì ani da furmà una classe d'intillittuali corsi. Hè cusì ch'iddu nasci à pocu à pocu u sintimu naziunali, chì hà da crescita è hà da sbuccà à nant' à a rivuluzioni di u 1729.





Ponti ghjinuvesu.